

RIOM: program 2018 digl Origen Festival Cultural

«Dobro pozhalovat» alla Russia ...

G.N.S. ... gea uscheia sa nomna bavegna an russ. En antier onn dedigtescha igl Origen Festival Cultural alla Russia e chegl cun musica, solt, cant, prelecziuns, exposiziuns e cumegia. En punct culminont vign ad esser igl mez d'avost a Riom, la surdada uffiziala digl premi Wakker.

Igl feil cotschen dallas numerosas producziuns digl Origen Festival Cultural è gist per 12 meis la Russia. Litteratura e material da chella naziun dattigl ple tgi angal interessanta e gist da chel aspect è er Giovanni Netzer, igl intendant digl festival da cultura fascino. Enea duple vign el er la proxima stad a far experimaints, chegl tgi totga tar el tar igl mintgade. El è ansomma betg chel tgi derva la trocla per tschartger en libretto tgi è eneda nia scretg per ena producziun, na el è chel tgi ò sez igl dung e la sensibilidà da metter an palpieri e maletgs las sias visiuns e las sias ideias. Chegl è er igl davos taimp sto igl cass, avend Giovanni Netzer savia preschen-

tar ier a Turitg igl program dalla stad culturala 2018.

Dallas migras tgesas da ballet

Enea duple stat igl solt aint igl center e chegl cun producziuns da solt digls pi ancunschaints ballets digl mond. Da St. Petersburg ainten la tor cotschna sensom igl Gelgia per sa preschentar agl public vign ena gruppa da saltunzs digl Teater Mariinski, la sagond populara tgesa da teater e da ballet digl antier mond. Eno Peci, tgi è sto avant curt responsabel per la coreografia digl grond bal d'opera a Vienna, vign ad inscenaar ainten la tor d'Origen en bal singular, scu strousch anc via tar nous. Ultra da chegl mantga er betg ena gruppa da solt da Den Haag, Minca e da nov an nossa regiun vignan saltunzs e saltunzas digl Ballet da Helsinki. Igl star tranter igls saltunzs, Sergei Polunin è da veir a Son Murezza ainten la halla da tgalvalger, ella tgi stat sot la protecziun da monumaints. Digl reminent è chel bietg historic nia construia avant decennis digls amprens giasts dalla Russia tgi on fatg vacanzas a Son Murezza.

Er igls cumediants èn per veia

Singuls bietgs da Riom, scu per exaimpel l'antieriura scola e canzleia retschevan ena nova fatscheda e chegl cun urden igl pi fegn dalla Schläpfer SA, Son Giagl cun Martin Leuthold, en grond amei e promotour dad Origen. La tgesa tgi segna adegna per la producziun da teila digls vistgias digl Origen Festival Cultural, ed er per la «haute couture» scu «Chanel», «Lagerfeld», «Armani» etc. Da vaseir è a Riom er en teater sot tschiel avert, tgi sa nomna: Grand Palace Riom e rachinta scu tgi è betg reuschia da biagier a Riom en hotel digl taimp dalla Belle Epoque. Per veia tras igl antier cantun ed er ordvart chel è scu mintga stad er la gruppa cumedianta dad Origen cugl reschissour Fabrizio Pestilli. Cun la sia gruppa preschainta el la burlesca: igl mester e Margarita. Agl hotel Liun agls Mulegns, en bietg tgi ò do cutier a conts, zars e prenzis dattigl interessants prelecziuns. A Riom aint igl Café Sibira canta en ensemble las pi belas canzungs da malancuneia ed aint igl casti da Riom vign l'exposiziun da vistgias exclusivs cunzont a plascheir allas donnas. En de tgi stat aint igl cenetr naziunal è alloura igls 18 d'avost, cura tgi Giovanni Netzer e sies collaboratours retschevan a Riom uffizialmoint igl premi Wakker 2018.

Ena survista dallas occurrenzas impurtantas

2 da zarcladour: avertura digl hotel, digls luvratoris e digl biro da construcziun a Riom.

22 da zarcladour: avertura dall'exposiziun agl casti da Riom e scola Mulegns.

5 da fanadour: bal da benefezi tor sen Gelgia.

14 da fanadour: avertura halla da tgalvalger a Son Murezza cugl saltunz Sergei Polunin.

25 da fanadour: premiera gi liber Grand Riom Palace.

5 d'avost: premiera Teater Mariinsky-saltunzs sen Gelgia.

18 d'avost: surdada premi Wakker a Riom.



On preschento igl program cultural dalla stad digl Origen Festival Cultural.

(davos da san.) Maria Theresa Steinocher, Kesha Rüeger e Sabina Küttel.

(davant da san.) Ilia Zhivoy, choreograf, Andrea Hämmerle, president Pro Origen, Giovanni Netzer, intendant Origen, Adrian Schmid, magnagestiun protecziun dalla patria e Yuka Oishi, choreografa.